

四庫全書

集部

欽定四庫全書

集部

誠齋集卷一百十八

詳校官庶吉士臣陳若霖

主事臣呂雲棟覆勘

總校官檢討臣何思鈞

校對官中書臣宋枋遠

謄錄監生臣朱上林

賢推為帥其扞及旁郡甚遠也不立名號亦不屬人至國初乃歸來我藝祖嘉之授水部員外郎為江南發運使語在國史為先生八世祖自德言以前系世莫考相傳宋彭城王義康徙安成郡子孫家焉今安福也先生之族自從祖溥以文章魁恩科羣兄弟策進士者六人薦名者三十三人先生之兄曰安鎮字鎮臣有文名以貢士客死京師先生時尚少盡得兄之學諸老先生見者曰是不可量足為劉鎮臣之弟紹興初盜起先生奉

欽定四庫全書

誠齋集卷一百十八

宋 楊萬里 撰

行狀

朝奉劉先生行狀

先生諱安世字世臣本貫吉州安福縣叢桂坊曾祖故
不仕祖贇故不仕父思贈右承事郎先生之先有諱德
言者居安福五代亂里中子弟起兵衛井邑德言毅且

其承事公避地適與二盜遇先生白承事公前行先生橫一杖以逆之盜有牽小留而承事公已遠矣先生亦免焉古書所稱孝足以感盜心者世未必盡信也觀先生之事未知古人何如耳紹興十四年十七年先生連薦名皆首選十七年再舉先生對策極言守令不才致民流殍其語痛刺骨考官不樂降在第四名登進士第授左迪功郎岳州司戶叅軍兼攝錄事叅軍有野夫為傭保於大姓者父病謁至歸省主人不可野夫徑去主

人以盜告官獄具如章先生爭之曰野夫以孝而刑謂此邦之人何岳民呼舞稱賀郡丞以文吏薄武人議月奪諸將俸之半先生爭之不得頃之諸將激其徒譁且變居民惶擾空城避之先生曰出納非守丞事也庸不在我亟發帑取給當是時徵先生幾無岳州期滿陞秩左從政郎永州州學教授先生嘗獨騎一馬詣學館墜而傷既受代先生未瘳州家憫其客間貧病以攝它職廩先生先生受之將行先生持所受歸之官為錢六十

萬太守左史王公宣子驚異曰使士大夫皆如劉世臣

二

闕

不有焉可也以薦者改秩左宣教郎知贛州雩都

縣贛俗剽且相訐先生至曰民無祿良也淑慝者政耳

邑之大駟有孫氏鍾氏根結盤互異時守令瞪視莫敢

拊其角牙一日從惡少椎小民於市先生曰是敢爾命

擒之吏素畏二氏疑莫先徃先生罷一吏乃能寘之獄

抵罪僚吏人士為之遊說先生卒不奪曰吾非無教之

誅也郡丞行部至縣諷先生以獻羨餘錢五百萬先生

曰縣之土田瘠而賦歛重而將焉取餘令可逐一錢不可得郡丞怒讒之守不聽讒之使者又不聽郡丞窮且愧乃作詩以遺先生先生謝郡丞亦謝先生之政主之以不猛繼之以不懈徃徃日昃而進晨飡得疾以歸太守有憐先生者為之勾祠祿邑之民曰劉公非吾縣尹也吾父母也皆走送先生遣之不肯去以朝奉郎致仕享年六十有八終於家先生平昔排佛老不遺餘力嘗曰士大夫而談此乃吾夫子之叛卒也至是遺命子弟

曰喪祭不得以佛老為禮太夫人李氏贈太孺人配彭氏封孺人皆以先生貴男四人格非去非勝非知非女三人嫁李大年羅昌辰夔州錄事叅軍竇依格非奏補將仕郎先生自太夫人即世每饋祀必慟哭奉承事公無不盡退謂妻子曰事親之謂色養不得其悅不謂之子先生之諸兄皆早世先生聚諸孤而衣食之每白承事公曰安世任此責願大人無所為憂承事公既没先生嘆曰吾嘗許吾先君今日之事先諸孤後吾子田宅

貨財秋毫無所分教諸猶子待其成畢其婚嫁先生之
未仕也士之來學者百千人有富貧慧蠢不同先生槩
加誨導人人自以為得先生學先生有文集三十卷論
語尚書解二十卷先生之學不為空言其原委自賈誼
陸贄蘇明允父子之外不論也故其文與其人皆肖焉
然策第之日先生年四十九矣蓋其族夥應書之歲率
以期功之喪而不得試藝者凡二十四年使其逢之不
遲用之不狹其功用豈小哉先生仕二十年而貧如初

然先生之四子以文相高先生曰吾為不貧矣先生之
在永州請於郡建故權通判瀟溪先生祠堂謂永之士
曰周濂溪之不師柳子厚之師不可也是時丞相魏
國張公謫居於永每稱重先生曰實學之士張公再相
萬里見公公問劉世臣今安在好一講筵官也公未及
薦以讒去先生尋亦病矣如先生者不得用得用者不
必如先生人或以是惜先生先生不自惜也萬里也先
生門弟子之下者然從先生最舊及某丞零陵縣侍先

生更未盡一歲萬里復得就先生而卒業先生之喪也
萬里嘗見張魏公為張子韶侍郎服友之服又見澹菴
先生胡公及羅長卿為清節先生服師之服萬里敬為
先生制服焉因與先生之子去非謀請銘於名天下之
能文辭者去非曰先生行狀子當作萬里謝曰非其人
也三辭不獲命乃以叙於篇謹狀

宋故資政殿學士朝議大夫致仕廬陵郡開
國侯食邑一千五百戶食實封一百戶賜紫

金魚袋贈通議大夫胡公行狀

曾祖璉不仕

曾祖母夫人康氏劉氏

祖愷贈承務郎

祖母張氏封孺人

父載累贈太中大夫

母陳氏張氏所生母曾氏俱贈淑人

公姓胡諱銓字邦衡其先金陵人五季避地廬陵祖愷

未仕而沒贈承務郎父載累贈太中大夫母陳張所生
母曾俱贈淑人皆以公惟祖母張以百歲封孺人云太
中氣慷慨以試有司無遇即棄去自幼超詣絕世強於
記覽有質以古書者必曰是出某書某卷驗之而信年
二十八太學試文淨不加點博士驚異建炎二年屬太
上皇策士於維揚初擢公第一有媚其直者竟第三授
文林郎撫州軍事判官未上而昭慈聖獻皇太后避敵
於虔州敵踵至公哀眈為兵與闕

撫州太守張

循軍合遏其衝敵退論功轉承直郎權吉州軍事判官
時羣盜四起守臣張中彥檄公督別將趙之儀捕之覘
者請夜襲之公不可曰賊掠民自從將毋俱焚遲明賊
遁掠者得釋未幾丁太中憂除喪與兄蓬山居士鑄築
精舍於里之洞巖從名儒蕭楚講畫古學冥搜治亂安
危根株或勉之仕不荅紹興五年忠獻魏國張公浚都
督諸路兵辟公提舉荆湖北路常平茶鹽司幹辦公事
故荆湖南路提點刑獄司幹辦公事多赴都堂審察兵

部尚書呂祉以賢良方正直言極諫科薦賜對便殿
公論持勝及納諫及屢寇及營田事上曰營田孰初對
曰田制邈矣三代曰井春秋之晉曰爰秦之商君曰轅
漢之晁錯曰屯趙過曰代充國曰營我真宗用耿望之
計於是乎治屯田仁宗用歐陽修之議於是乎建營
田無弊法有弊吏今募民營田官給之牛具貸之種矣
然湖之南土牛之所生市之以出鄉則無金牛降之嘉
種官有其費強之於吏乎則無實惠上曰善當改之

改通直郎樞密院編修官七年十一月宰相秦檜決策
暨金人平王倫誘致金使以偽詔來責禮卑甚中外洵
洵公獨奏封事其畧曰臣謹按王倫本一狎邪小人市
井無賴宰相無識舉以使金誘致金使以詔諭江南為
名是欲臣妾我也是欲劉豫我也豫臣小醜南面稱王
自以為子孫帝王萬世之業一旦豺狼改慮猝而縛之
父子為虜商監不遠倫又欲使陛下效之夫天下者乃
祖宗之天下也今陛下所居之位乃祖宗之位也柰何

以我祖宗之天下為敵國之天下以我祖宗之位為敵國藩臣之位今陛下一屈膝則廟社盡被污辱赤子盡為左社官執盡為陪臣異時豺狼無厭之求安知不劉豫我乎夫三尺童子至無知也指仇讐而使之拜則拂然怒今堂堂天朝相率而拜仇讐曾童孺之所羞而謂陛下忍為之耶倫之議乃曰我一屈膝則梓宮可還太后可復而淵聖可歸中原可得嗚呼自變故以來主和議者誰不以此欺罔陛下然而卒無一驗則敵之情偽

已可知矣而陛下尚不覺悟竭民膏血而不恤忘國
大難而不報含垢忍恥舉天下而臣之甘心焉就令敵
決可和盡如倫議天下後世謂陛下何如主况仇敵
變詐百出而倫又以姦邪濟之梓宮決不可還太后
決不可復淵聖決不可歸中原亦決不可得此膝一屈
不可復伸國勢陵夷不可復振可為痛哭流涕長太
息者矣向者陛下間開海道危如累卵當時尚不北面
臣之況今國勢稍張諸將盡銳士卒思奮只如頃者

強敵陸梁僞豫入寇固嘗敗之襄陽敗之淮上敗之渦
口敗之淮陽校之蹈海之危固已萬萬倘不得已而用
兵我豈遽出敵國下哉今無故而臣之欲屈萬乘之尊
下穹廬之拜三軍之士不戰而氣已索此魯仲連所以
義不帝秦非惜夫帝秦之虛名惜夫天下之大勢有所
不可也今內而百官外而軍民萬口一談皆欲食倫之
肉謗議洶洶陛下不聞正恐一旦變作禍且不測臣
竊謂不斬王倫國之存亡未可知也雖然倫不足道也

秦檜以腹心大臣而亦為之孔子曰微管仲吾其被髮
左衽矣夫管仲霸者之佐耳尚能變左衽之區為衣冠
之會檜大國之相也反驅衣冠之俗為左衽之鄉則檜
也不惟陛下之罪人實管仲之罪人矣孫近附會檜議
遂得叅知政事檜曰敵可講和近亦曰可和檜曰天子
當拜近亦曰當拜嗚呼叅贊大政充位如此有如敵騎
長驅能折衝禦侮耶臣謂檜近亦可斬也區區之心願
斬三人頭竿之藁街然後羈留北使責以無禮徐興問

罪之師則三軍之士不戰而氣自倍不然臣有赴東海而死耳寧能處小朝廷求活耶書奏除名編管昭州時侍御史陳剛中諫議大夫李誼吏部尚書晏敦復給事中勾龍如淵戶部侍郎李彌遜向子諲禮部侍郎張九成俱入對引救檜廵公議亦偽為救公者謫監廣州都鹽倉改簽書威武軍判官事於是寺丞陳剛中以賤賀公曰屈膝請和知廟堂禦侮之無策張膽論事喜樞庭經遠之有人又曰知無不言願請上方之劍不遇故去

聊來下澤之車陳坐是謫知虔州安遠縣死馬十二年
御史中丞羅汝楫彈公以奉議郎除名謫新州同郡王
庭珪以詩贈行有癡兒不了公家事男子要為天下奇
之句為歐陽識所告王坐貶辰州新州太守張棣告公
訕上再謫吉陽軍時有觀察某上書乞代公行不報張
棣擇一牙校游崇者送公至半途臨大江崇拔劍而前
公色不動徐曰逮書謂送某至吉陽者賞爾不愛賞乎
崇笑而止至朱崖或諗公以有後命家人為慟公方著

書怡然也吉陽士多執經受業者凡經垓冶皆為良士
初吉陽貢士未嘗試禮部公勉之行及位於朝乃請廣
西五至禮部者乞不限年與推恩自是仕者相踵聞母
曾之喪一慟幾絕勺飲溢米三日不歛鬚髮盡白見者
出涕先是檜大書丞相趙公鼎叅政李公光及公姓名
於格天閣冒進者爭以公為梯監察御史田如鼇獻書
乞斬公檜抵之地光坐移書於公再貶儋耳武平連通
判方疇以致書議姻遂下若盧二十六年檜卒公量移

衡州三十一年正月公與忠獻公偕命自便時忠獻謫
零陵公自衡造馬館於讀易堂忠獻從容謂公曰秦
太師顓柄二十年成就邦衡一人耳今上即位首復
公官除知饒州召至行在所即日賜對上溫顏曰久
聞卿直諫公首論為國以禮又論今日之事在修德以
結民心固吾圉練兵選將以觀釁待其衰上嘉納除
吏部郎遷秘書少監又遷起居郎論史官失職有謂記
注不必進呈使史官無諱史官當立於御座之前庶幾

言動皆得以書令之史官後殿立而前殿不立請前後
殿皆立左右史奏事請令直前不必預白閤門及以有
無班次為拘許之自是史職盡復原制還祖宗之舊
公請遷都建康謂漢高入關中光武守信都大抵與人
鬪不搯其吭拊其背未能全勝今日大勢自淮以北則
天下之吭背也建康則搯之拊之之地也若進據建康
下臨中原此高光興王之計也況今西北欲歸之人如
漢民之思漢苟不移蹕何以繫其心詔議行幸言者請

紓其期遂止隆興元年六月忠獻張公自建康入秦圖
恢復計侍御史王十朋力贊之於是忠獻公督師進討
金人既克宿州以大將李顯忠欲其金帛且與邵宏
淵私憤復敗於敵上憂甚十朋亦自劾上愈怒公言
近者淮上之衄蓋天以是厲陛下之志使動心忍性
增所不能願益強其志毋以小衄自沮免乘補卒期於
身濟大業時宿州之師賞罰衡決言宿州之敗誤國之
將厚賂權貴游說自解安處善地誅戮不加禍亂之漸

間不容髮願毋忽兼侍講及國史院編修官因講禮記
進序篇其畧曰君以禮為重禮以分為重分以名為重
名以器為重願陛下辨其分謹其名守其器勿輕假
人七月上以旱蝗星變詔問關政公請勿徼福於佛
老之教而躬行周宣慶旱之誠戒監司守令有貪殘者
必罰是應天以實公因論納諫曰今朝廷之士以緘默
為賢容悅為忠道路相傳近日臺諫論事朝廷謂為賣
直臣未知信否夫賣直之言唐德宗之言也德宗猜忌

謂姜公輔為賣直出此一言忠臣結舌馴致興元之變
所謂一言喪邦者也願陛下以德宗為戒以太祖皇
帝欲拜昌言為法上曰非卿不聞此九月金人求更
成大臣欲從之公奏曰彼知陛下銳意興復移書請
和非甘言誘我即說計緩我爾願鑒前車之覆益修守
備益張吾軍上曰朕有二說斷然不移一則中原歸
附之人決不可遣二則中外名分決不可亂又曰邊事
倚張魏公乃對曰陛下至誠如此何憂強敵願持之

以不懈絕口不言和字上曰卿忠直如此朕甚喜兼
權中書舍人公遜於右史馬麒上曰無以易卿又言
恐駁事不勝任上曰貴當理遂就職進兼同修國史
有旨以中人李綽等常典發軍書無誤各進名一列
公不奉詔綽等泣訴上曰胡銓不肯經筵講禮記至愛
而知其惡憎而知其善公曰愛而知其惡必棄之勿疑
憎而知其善必任之不貳上稱善壽聖明慈皇后改稱
教旨為聖旨公言易曰大哉乾元至哉坤元蓋天地之

位不可並故以大哉至哉為別陛下雖奉親盡孝而
光堯與壽聖實難於並稱聖旨上嘉納謂樞密洪邁
曰奉親之過朕當自受張栻召對賜三品服公言君子
愛人以德今賜栻服章非愛之以德也其父浚決不肯
使之輕受栻亦有守決不肯接受恐或議浚非全浚也
十一月上以和戎之利病遣使之可否禮文之後先
土疆之取予下廷臣雜議公議曰國家與金人講解覆
轍亦可睹矣京都失守自耿南仲主和二聖播遷自

何臬主和維揚失守自汪伯彥黃潛善主和完顏亮之變自秦檜主和國家罹金人之禍何嘗不以和哉議者乃曰陽與之和而陰為之備外雖和而內不忘戰此又向來權臣欺君誤國之言也一溺於和則上下偷生將士解體終身不能自振尚安能戰乎大臣見之相顧失色於是益忌公且欲奪魏公兵柄公復沮其議除宗正少卿公請補外不允嘗遞宿玉堂上問曰金人汲汲欲和聞其勢窘甚對曰近有自淮甸來者云金人聞近

陛下力任張浚所以汲汲欲和臣願陛下委任勿疑
則恢復可必上曰善公又申前請上曰卿久在瘴
鄉而畧無瘴色天祐直諫卿未宜去兼國子祭酒因
見公言往年睿旨欲移蹕建康不可但已上曰澶淵
之役當時有勸幸蜀及江南惟寇萊公決策公曰今張
魏公陛下之萊公也願早定計上曰善卿直諫四海
莫不聞不可言去且留經筵事無大小皆以告朕公言
晉開運之末有陳友者殺李璘之父國初璘遇友於途

手殺之而自言鞠之得實太祖壯而釋之臣願陛下
堅復讎之志以不忘太祖之訓上在講筵謂公曰卿
之學術士所甚服因及此日文士如蘇軾黃庭堅者
誰與對曰未見其人詩人如張耒陳師道者誰與對
曰太上時如陳與義呂本忠皆宗師道者上曰如韓
駒徐俯皆有詩名卿可廣訪其人退而乃薦王廷珪
朱熹楊萬里周必正弟鎬猶子昌齡籍云除兵部侍郎
公言受降古所難六朝七得河南之地不旋踵而皆失

在梁武時侯景以河南來奔未幾而陷臺城在宣政間
郭藥師自燕雲來降未幾而為中國患今敵中三大將
內附高其爵祿優其部曲以繫中原之心善矣然處之
近地萬一包藏禍心或為內應後將噬臍願勿任以兵
柄遷其衆於湖廣耕種以絕後患時有國學士獻書闕
下乞用福國陳公康伯及公為腹心者七十有七人二
年八月上以災異數見避殿減膳詔廷臣各陳闕政
及急務公言禹有九年之水而國無捐瘠備先具也今

數路水潦曾不踰時而民已流殍無備甚矣願詔遭水之處博施賑卹使民被實惠無至流徙此先務也今陛下又令條陳闕失臣謂今之闕失孰有大於和議者因極陳和議可痛哭者十上太息公言自靖康至今凡四十年敵未嘗不由詭道而我終不悟也竊聞道路之言彼緩我以和其實潛師以伺我或言多作戈船由海道以進或言實粟塞下由間道以來願陛下堅守和不可成之詔力修政事十年生聚十年教訓如越之圖

吳則社稷幸甚進黃侍讀因進讀寶訓至食訖習射奏
曰四裔易以兵制難以信結願陛下謹守此言上曰
文武豈可偏廢又讀真宗顧李宗諤曰聞卿至孝能
保宗族朕守二聖基業亦猶卿之守門戶公奏曰唐
柳玘云積累如登天覆蔭如燎毛祖宗基業誠不易守
上稱善公言側聞金人有嫚書欲議書禮有所增損議
者謂末節不必較臣竊以為議者可斬也四郊多壘卿
大夫之辱楚之問鼎義士恥之故獻納二字富弼以死

爭之今強敵橫行與多壘孰辱國號大小與問鼎輕重孰多獻納二字與再拜孰重臣子爭與君父屈已從之是多壘不足辱問鼎不足恥獻納不足爭也臣願絕和議以鼓戰士左氏謂無勇婦人臣謂今日舉朝之士皆婦人也十一月以邊鄙有釁詔改北郊用來年正陽之月大雩之辰公稽叅禮經及國朝故事陳不可者十宰相湯思退參政王之望等堅主和議遂罷張魏公兵柄公又力爭之於是大臣皆不悅遂除措置浙西淮

東海道奉詔旨趣行以二日為期公即辭行曰臣願今
陛下先絕和議爾上曰要盡其在我者時金兵及境號
八十萬聲動輦轂下自維揚海陵連數郡望風棄城高
郵太守陳敏與敵相距於射陽湖水軍帥李寶屯江陰
而寶預求密詔謂扼守要害陰為自安計公檄寶發兵
援敏寶不行公奏曰臣受上詔令范榮備淮李寶備江
緩急則更相援今寶逗遛違上詔坐視敏之孤立恐射
陽失守則大勢去矣上乃以命寶公又移書切責之寶

乃發兵渡淮與敏相犄角敵一夕退時天大雪河冰皆
合舟車不能進公先使軍鉞冰士皆奮尋詔罷兵而時
相亦斥死除提舉江州太平興國宮加集英殿修撰知
漳州改泉州入見言郡邑害民之大者三事上曰每思
卿直諒朕恢復之志已決今敵國土木不息旱乾相仍
機不可失對曰昔陛下嘗許臣以誓不與敵和何為中
變又謂臣決移蹕建康何為中輟耶上曰以民之不易
少須又曰在廷大半腐儒卿不可去一日秘書郎張淵

對選德殿上因數不詭隨者云猶有胡銓一人在除在京
宮觀兼侍講公論前古未有不由講學而興滅學而亡
精兵百萬不如道德之威被練三千不敵忠信之胄也
陛下之意端在於是矣上稱善除權工部侍郎以修史
書成轉承議郎因入見上曰屬已得契丹要領卿觀朕
施設公言少康以一旅復禹蹟今者陛下富有四海非
特一旅而即位九年復禹之效尚未赫然又言四方多
水旱迺者乙酉之歲修門之外斗米易一婦女小兒半

之左右不以告此謀國者之過也宜令有司速為先備
尋即工部為真公辭焉上詔曰汲黯在漢謀寢淮南隨
會仕晉盜奔秦境卿其奚辭賜對衣金帶封廬陵縣開
國男食邑三百戶令叅政周公必大視草仍以御札歸
公令藏於家公嘗燕見言初元經筵之臣七人惟臣獨
在臣老矣願乞骸骨歸田里上曰卿忠孝有物護持且
留觀朕恢復屬立皇太子公請飭太子賓僚朝夕勸講
上曰三代長且久者由輔導太子得人所致末世國祚

不永或七八年或五六年或三四年皆由輔導不得其
人所致對曰誠如聖訓公力乞致仕除寶文閣待制
與外祠既出都門有旨復留改右神觀兼侍讀公辭不
得請於經筵講罷復申前請上曰卿大節可嘉朕不
忍令卿去因論納諫公曰從諫人主之高致陛下自
登大位虛懷受言中外翕然咸謂恢復之期指日可冀
然靡不有始鮮克有終光武之殺劉洎終之實難詔舉
堪刑獄錢穀及有智畧吏能各二人公以張敦實昌永

周必達李發劉之柄應書言者謂舉李發劉之柄非是
公坐貶秩二等三求去上不得已從之除敷文閣直
學士與外祠辭行言於上曰願陛下規恢遠圖任
賢除邪理財訓兵撫寡恤孤然後布告中外必報國
讎必歸陵寢必復故疆以副太上付託上曰朕志也
又問卿今何歸對曰廬陵又賜通天犀帶又曰臣在嶺
海無所用心妄意經學三十年粗能訓傳上曰卿可
進來既歸詔趣之遂表進易春秋周禮禮記解命藏

之秘書省復奉議郎除龍圖閣學士提舉江州太平興
國宮制有身蹈東海獨仲連不欲帝秦名重太山微相
如何以強趙之語光堯天聖七十慶壽湛恩轉朝奉
郎進封開國伯益邑三百戶公復乞致仕優詔不許除
端明殿學士明堂合祭禮成復增邑戶三百實封百戶
淳熙六年十一月召赴行在所公辭焉復力乞致仕不
許公遂引疾轉朝議大夫提舉江州太平興國宮遂稱
篤且極陳時病五事上察公志不可奪乃加資政殿

學士致仕明年夏五月疾革庚辰薨不及家事惟命諸
子口授遺表有死為厲鬼以殺賊之語奏聞特贈通議
大夫年七十有九諸孤卜於是歲十月丙午葬於廬陵
縣之儒行鄉松山原祖承務府君瑩之右公明德峻極
敵絕敬畏丞相洪公述其先忠宣公敵中事云皇
太后以書歸曰胡銓封事此有之知中國有人益生懼
心公於利不苟取初欽祖既祥及冊隆興皇后公
以職將事皆賜金帛再辭必得請乃已使海道日賜金

十鎰既歸或基之以理生業者悉以調婚友之貧是其
於君賜尚爾故沒齒九疇不益一晦遽於禮學冠昏喪
祭式禮迂叟佛老梵唄焚紙為錢一切剝絕四仲享先
設醴分膳坐客百人州閭耆老不遺貧賤挹料必躬投
壺賦詩雜以琴奕往往申旦睦族篤親慶弔必詣寒暑
風雨不為回車居新興時嘗名其室曰澹菴取賈生澹
若深淵之意晚自號澹庵老人云公居無事時下心拱
手言恐傷人獨論國事勁氣正色貫日襲月奮以直前

不怵不惻不疚不式大節揭揭細行斬斬動容出辭見
者起敬長身玉立望之山如即之春如其為文章駿奔
軋忽幽紛膠輶隱帙竒字旁摳遠擷初讀之者口吐語
難徐綜其緯理順脉屬似肆實莊若險實夷韓碑柳騷
婉高儷美中興以來作者寡二筆畫真隸上規顏蔡鐵
屈石出省其作人飯不重肉一製十稔而豆區飢民棺
斂道殣退省其橐屨空不贏惟太中公不貸於積繫德
之植公實儀之蓬山既逝公字其子歲在癸巳瀟以公

任孝友惟祇忠義惟幹後茂碩人豈一朝夕公有澹菴
文集一百卷周易拾遺十卷書解四卷春秋集善三十
卷周官解十二卷禮記解三十卷經筵二禮講義一卷
奏議三卷學禮編三卷詩話二卷活國本草三卷娶劉
氏贈淑人先公卒中散大夫荆湖南路提點刑獄敏才
之女子男五人泳承務郎監江東淮西總領軍馬錢糧
所太平惠民局兼行宮雜賣場淳熙二年卒於官參政
周公哀而銘之解承事郎監潭州南岳廟浹瀟皆承務

卽冲未命女五人適南昌嚴萬全福唐葉昌嗣上饒方
自厚承務卽贛州興國縣丞王宗孟將仕卽王藏孫男
六人槩槩程杙机楷女四人長曰相孫天餘皆幼萬里
與公同郡常從學公將窺萬里以繫嶺表不得築室於
場澥走書二千里以公猶子承務卽致仕昌齡所述公
之言行詭萬里論次將乞銘於叅政周公萬里敬慟哭
而書之掛一漏萬知不能免大端則畧具於是矣謹狀
淳熙七年九月日門人朝奉卽提舉廣南東路常平茶

鹽公事楊萬里狀

宋故贈中大夫徽猷閣待制諡忠襄楊公行
狀

曾祖亨故不仕

祖中謹故不仕

父同故潭州司戶叅軍贈宣義郎

公諱邦乂字希稷系出漢太尉震五代之亂徙居廬陵
故今為吉州吉水縣人世以儒學相承宣義府君登進

士第初命長沙民掾未終更而早世後以公追秩宣義
郎公其季子也父歿之五月始生未冠而妣陳夫人即
世兄弟相為命公天性孫悌視兄猶父嘗揭其所居之
堂曰華鄂仲氏沒公時賓貢入京聞訃慟絕太學七年
苦心嗜學言行忠敬必以古人自勵政和七年以上舍
解褐賜第還家拜伯氏感兄之訓更華鄂曰韓韓同郡
郭孝友記之曰予嘉楊氏友其弟而不怠恭其兄而不
忘是可振頽俗矣一時名勝賦之者數百人初調歙州

婺源縣尉改蘄州州學教授以育才作人爲己任不顯
文辭而已學政最准西使者交薦授從政郎廬州州學
教授改南京宗子博士又改建康府府學教授秩滿改
宣教郎辟權知本府溧陽縣事縣久苦苛政公當官豈
悌先教化後財利均征繇遠近悅服惟恐其去傾邑請
留於部刺史者數千人尋命爲真遇光堯踐祚覃恩轉
奉議郎時惟二聖北狩中原多故寇盜蠭起公訓民爲
兵五里一堠號令期會明信而肅枹鼓一鳴遐邇畢集

未幾府兵叛閉關殺官吏四境狼顧慮變公繕治軍實
大閱民兵申嚴號令刻日趨府討叛者賊畏公威聲亟
白部刺史願從諭招發運方公令諸郡之師討賊公董
民兵首集城下士整而奮器甲犀利旗幟鮮明觀者偉
之已而羣凶就禽初兵之叛也溧陽縣舊縣鎮射士數
十百以羽檄徃戍它所乘隙離伍圖歸劫巡檢為魁甲
而趨溧陽欲屠之以掠其金帛公即帥民兵逆之諭民
出財募士殺敵者賞一戰賊殲焉邑人德公肖像祠之

部刺史奏功議賞公悉推僚佐任三年盜不入境建炎
三年十月當受代九月除通判建康軍府兼提領沿江
措置使司公事大將杜充擁兵數萬保建康公以兵隸
焉是時賊李成剽掠江北瀕江守備十二月充謂成師
老遣戰艦擊之偶金兵大至與成合我師遂敗績敵取
我舟以濟奪馬家渡充出兵復戰不利潰兵夜叩南州
以入敵進營於南門外鐵佛寺充下令官吏兵民用命
城守公信其言明日充悉師出下水門乘舟以遁金陵

空無守備知軍府事陳邦光柔怯不足賴是日父老驚懼擁邦光出城迎拜敵前亦強公以行公至街橋大呼曰我豈為降敵者欲赴水父老救免既至敵營邦光以下皆拜願降公獨僵卧不起邦光乃啟曰通判素有瞋眩疾敵帥曰四太子者乃掖出療之遣所降官屬勸降閉口不答明日復遣所親厚者說之曰公故貧者有兄垂老仰分祿寡嫂孤姪遠來就養五子尚幼一女未嫁今去家數千里妻孥皆無所於托寧不念此國家事勢

至此公不降將誰為公曰茲人之常情吾獨無情乎家
國事不兩立吾計決矣願無辭費明日四太子置酒令
偽知軍府號張太師者及前知軍府事陳邦光召公議
事公拒不往衆挽以至庭其二人已就位虛一席以俟
公及階以首觸柱礎疾呼曰我豈貪生與犬豕均飽者
流血被面憤不蘇者父之左右掖之出敵帥大怒幽之
它室明日邦光役諸出諭使降乃釋出至庭邦光降階
語曰事固無可奈何願少回意毋為徒死無益也公瞋

目曰爾以從臣守藩臨難不能死甘心屈膝仇敵苟生
復幾何時使人人效爾則朝廷何賴時坐有敵將曰門
練刈者取幅紙書死活二字示之曰汝無多言忠於趙
氏即書死字下歸書活字下公起取筆徑書死字下敵
帥大怒復囚之先是公刺血書襟曰吾寧作趙氏鬼不
為他邦臣敵人初不知也明日復引公出南門皆問公
意如何答曰直不能降汝爾四太子震怒公迺大罵曰
我既食趙氏祿終不負國汝外裔豈是真天子乃使我

從汝我國家何負汝而敢肆凶殘吾恨未劒汝頸吾豈
為死怖耶遂裂布褫衣以祈速死敵見所書襟知不可
屈遂害之剖腹取其心聞者哀壯之實建炎三年十一
月二十七日也享年四十有四先娶傅氏生女一人後
娶魯氏生男五人振文郁文昭文蔚文月卿月卿早夭
時振文纔十歲女後歸新淦進士陳敦書四年五月軍
府上其事於朝廷天子愍悼加贈直秘閣官其子二
人上詔廟祀於建康府紹興元年冬知軍府葉夢得

復請於朝以公大節罕傑褒表未稱宜加秩賜謚錫
廟號葬以禮二年三月詔復贈公朝奉大夫謚忠襄
廟曰褒忠仍付其事史官命有司改葬三月甲辰夢得
躬奉天子命率官屬啟公殯具衣衾棺槨葬於廟之上
東南隅之山五年十一月朝廷以公幼未仕即其鄉
賜田二百畝以廩其家七年四月大駕幸建康大臣復
有為言者光堯曰顏真卿異代忠臣朕昨猶官其裔楊
邦乂為朕死節可不厚褒加贈徽猷閣待制再賜田三

百畝銀兩絹足各百復官其一子昭文昭文孫於孺文
以報托孤之恩杜充之遁也或告公益去之公曰吾通
守苟去城誰與守我尚愛生也哉雖然吾仲氏惟一子
不可無炊火乃命其猶子孺文御其母以奔溧陽而屬
其子明日城失守云公神色明秀長身玉立見者畏愛
居無事時溫良惠和與物無忤及遇事決斷彊毅萬夫
不能奪也其德行循於家稱於鄉信於友為郡學官教
孚於弟子員為縣大夫恩洽於百姓至於以身殉國立

天下萬世臣節之端凌霜貫日非一時適然也故得天
子褒之曰綽有張御史之風無愧顏常山之節紹興三
十一年冬十月逆亮踰盟寇邊入淮南至江北建康震
擾人皆禱於公廟楚巫占之曰吉北主其殂北旅其遁
大邦其寧乎有老人夢公告之者亦云然十二月光堯
視師江左父老杜彥誠輩數十百人述其事競遮法駕
以聞有上旨下江東帥漕司驗問建康帥臣張公浚上
其子昭文蔚文祿尚不及願官之以勸忠義會逢今上

皇帝即位命官昭文明年又官蔚文公後以振文陞朝
四贈至中大夫公之被害也有斗子曰陳大伯者常從
公為儻至公被囚陳在旁不去公罵敵四太子陳亦舉
甓擊之不中遂同遇害又有主砮曰賈三郎者武勇絕
人時號為賈山砮亦同公被執賈命其子結里人為鬻
薪者置兵於薪以入閹人索之事覺敵磔其父子於市
朝廷既褒公之忠烈二人者亦各官其一子以武階邦
人肖其像於公廟立公之前歲時以從公之祀云謹狀

淳熙十二年正月二十四日姪孫朝奉郎尚書吏部員
外郎萬里狀

誠齋集卷一百十八

欽定四庫全書

誠齋集卷一百十九

宋 楊萬里 撰

行狀

宋故尚書左僕射贈少保葉公行狀

曾祖傳故泉州晉江縣尉累贈少保

祖寶臣故保州文學累贈少保

父建故不仕累贈少師

興化軍仙遊縣某鄉某里

公諱顯字子昂其先楚之沈氏春秋時尹將中軍其後諸梁改封葉子孫因以為姓世傳三國吳都尉雄五代漢衛州刺史仁魯皆其後也自黃巢亂中原士人避地南遷葉氏仕於泉因居焉本朝太平興國二年陳洪進挈泉入覲四年始割仙游莆田建興化軍公今為仙游人五世祖案隨洪進來朝授泉州文學太常奉禮郎累贈太常少卿少卿公三子皆以學行稱高祖都官公賓

其季也登景德二年第宋興仙游擢第者自公始終官
屯田都官二員外郎蔡公襄實誌其墓二子曰任曰傳
任以父引年得官傳景祐元年第進士授秘書省校書
郎泉州晉江縣尉蓋公之曾祖也累贈少保少保公娶
黃工部之女累封衛國夫人少保卒夫人年二十四守
義不奪至傾家創齋聘明師教子讀書蔡公又為作賢
母事記是生公之祖寶臣以累舉授保州文學累贈少
保父建晦迹不仕贈少師妣郭氏累贈瀛國夫人公生

於元符之庚辰方穉時兒輩羣嬉公獨危坐講誦弱冠
與伯氏覲俱入京師試太學秋賦俱薦名適金人犯順
朝廷設武藝謀略等科伯氏試中選授承節郎從大將
劉延慶守京城東北隅力戰遇害公徒步南歸壬子
車駕幸揚州廷策進士公擢第調廣州南海主簿無攝
尉有商私載鹽二舟監河官獲之以授公使白府以幸
賞公曰仕途發軔如作室之建柱柱一不正室隨以敝
賞以倖得是曰正乎盜發府檄尉與巡檢同掩捕巡檢

獲盜十餘人盡歸其勞於公公白府曰謀自彼出也今掠美歟君倖賞三者皆大罪也某不忍為府帥待制曾開大喜曰仕不求速勞而能遜退告其子連曰葉主簿宰相器也汝往見之因倡諸部使者薦於朝循從事郎調建州錄事叅軍建俗狠而喜訟或積年官不能決部使者賀允中多以屬公公原情諏律必得平亭旁郡民聞之有訴於漕臺者輒請以屬葉掾云建之兩稅每歲官受賦納遠民或憚入官府市人為之代持送官往往

過斂其估官民交病公適司納為立法革之先是市人代送者新幕帟持白金以供張司納之官公悉却之用薦者改宣教郎調泉州晉江丞未赴二親相繼即世服除知信州貴溪縣時詔行經界郡集諸邑長議之莫對或請以上中下三等定田稅公獨謂三等不足以定高下乃定為九等郡守大喜且令信之六邑皆式貴溪云又詔行鄉飲酒是禮久廢縣官無習聞者公舉行之登降獻酬少長有序得三代遺意公家蓄一酒鍾似瑠璃

而非蓋異寶也自上世藏弃二百年矣公在貴溪命匠以金飾之手觸而毀匠思將赴井公笑曰器之成壞數也汝悞爾慰諭而遣之更未盡三月民有以魔惑衆者因聚為盜一日至千餘人公先遣二巡檢將兵拒之羸糧備器自將射士七十人繼之二砦兵見賊衆不戰而遁公引兵登山望之賊疑未敢進公駐營山趾而植幟山顛日已晚賊且至與公對壘公夜潛遣人於賊營某所縱火約其衆曰火舉則亂射賊壘適五鼓西風急火

四起箭發如雨賊驚亂偶一渠魁箭貫其目及天未明
悉發兵爭擊之賊死傷甚衆餘皆潰遁入弋陽公引兵
歸七十人無一人傷者知紹興府上虞縣歲適大饑公
預白部使者請發常平之粟未報公即發廩鄰邑之民
多轉徙就食者役民必令民自推貨力甲乙不以付吏
民欣然皆以實應無欺隱者賦民必為文書各書其數
與之期使民自持文書與戶租至庭公親視其入給之
質劑皆便之明年府易帥屬縣趨府受約束新帥下令

諸邑今歲夏租先期送十之八諸令唯唯公獨進曰上
虞小邑往歲無秋今麥秋可望願少紓其期帥怒及麥
大熟公為書約民民相率輸租旬浹而畢反為諸邑最
帥大喜時秦檜當國數興大獄以除異已叅政李光已
逐海外猶欲殺之州縣逢其意爭躡藉之上虞李之故
居在焉公與李無一日雅因劄農過其門謁其子弟人
為危之府帥曹泳檜上客也嘗檄尉龔滂求李陰事滂以
問公告以毋庸為此且曰吾非為李實為君也秋滿造

泳特為戶部侍郎許薦於朝公固辭未幾檜死其黨皆
竄嶺海公謂弟曰使我受漕薦今與同禍矣禮部侍
郎賀允中以端方有守靜退無求薦公於朝召見公首
論國讐未復陵寢未還中原士民日夜企鑾輿之返顧
乃尚清言習逸樂非孟子困心衡慮之意其語切直高
宗皇帝嘉納越三日除將作監主簿遷司農寺丞公在
朝三年非公事未嘗詣丞相府樞密王綸知公恬退而
未知其德性欲試以事一日官告院失錦一端命公治

之公乃請寬其慢藏之罪於是綸大喜謂其客曰葉寺丞介而通嚴而恕真重器也未幾公求補外除知處州括蒼山國也地瘠民貧歲賦不給公節冗費量出入賦用充足有青田令陳光獻羨錢百萬公語縣錢何自而得耶且以所獻充所賦云宰相湯思退括蒼人也其兄犯禁其家奴屠酤不逞公繩以法思退不悅於是常州逋朝廷緡錢四十餘萬太守坐免繼者以憂死士大夫無肯往者思退移公之常州公至毘陵帑庫赤立官吏

無俸七閱月矣公究利病定規畫補罅漏郡計遂裕金
亮犯邊高宗車駕視師建康道毘陵公以職賜對於御
舟因言恢復之計莫先於擇將相張浚久謫無恙是天
留以相陛下也臣聞自逆亮死敵軍三十餘萬北歸帖
然而無異變是敵未可輕也且敵之初退遺兵僅三千
人在歷陽李捧擁萬人莫之誰何是我未能進也臣謂
今日爭言進取陛下宜容之公初至毘陵無暮月之儲
一年之後乃餘緡錢二十萬僚佐勸公曰某使者獻錢

若干某守獻錢若干皆賞公何不獻公曰某平生惡人
獻羨餘非重征則橫斂是皆民之膏血也某之所積固
出於權酷之贏然以利易賞某實恥之轉運副使林安
宅提點刑獄王黼疾公不附已思退因諷二人求所以
中傷者公聞之力丐祠官於朝未幾黼因劾奏常州事
坐不實免官而公以尚書郎召未至除右司郎中時孝
宗皇帝初即位欲清中書之務增宰士之員首膺是選
者余時言為檢正馬祺林安宅為左司費行之與公為

右司時下詔求直言公上封事謂以手足之至親付以
州郡之重寄是利一人而害一方時趙某為台州云遷
左司未幾權給事中公以右臂微痛求補外邊湯思退
再相公遂申前請思退曰公之求去無乃以某之來乎
既而思退啟擬除公戶部侍郎至於再三一日帝名諫
官曰葉某在都司二年甚宣力然與宰相為朋黨諫官
對曰臣不識葉顥聞之公論不然因具陳思退移公常
州之由及諷林安宅王超中傷事及思退再至公不自

安屢求補外意帝默然良久曰非卿則朕無以知此人
越翼日除吏部侍郎兼權給事中時隆興二年八月也
又三日復以公權本曹尚書四選之三悉歸銓綜吏抱文
書旁午相屬須臾即竟時七司弊事未去公乃上疏曰
選部之所以弊者蓋以典選之官貫穿案牘不如吏出
入條例不如吏歲月久遠不如吏典選一事衣冠清濁
之所由出也今乃使之入銓曹之門則與吏為市出銓
曹之門則與民為市可不思革之乎一曰隱占闕員之

弊二曰引例異同之弊三曰摭摘小節之弊三者革則
弊除矣公乃與郎官編刻七司條例為一書或事同例
異者存其一削其一帝覽之御筆褒表令刻板頒下公
又上疏曰法者天下之所共也合人情則公否則私今
吏部之弊莫重於行賂蓋立法有失其意者不可不改
也如令甲受賕有取予同罪之法今請勿罪與者而止
罪取者如任子有用堂除賞典而升名壓銓試人之法
今請勿陞以優中銓之士有未銓試者今請中書不許

除官有免試出官者今請雖宰相亦不許移貶帝遂立
為定制皇兄居廣請以初除開府儀同三司應得親屬
占射差遣例昇王若純公爭之曰若啟一若純則百若
純至矣帝從之於是始有大用公之意時洪适簽書樞
密院其三世已贈東宮三師又請於已覃恩二官貶高
祖父母且援李昉等故事詔已聽請公言移秩高祖禮
經所無也為人臣者官至執政封及三世恩至渥矣唐
臣謂追贈出於洪恩非由臣子之求斯言當矣國朝會

要止載李昉請以郊禮覃恩追贈所生父母李迪以籍田恩乞回贈叔父母未聞大臣以所得恩賞貤高祖父母者願循禮經改成命帝從之公在吏部二年士大夫之改秩者詣曹者會課者行賞者吏皆不得預時人謂渡江以來銓選平久惟晏與葉乾道元年七月晦前三日召對便殿賜坐賜茶禮異他日帝曰吏部條例朕亦置一通在禁中嘗徧覽之人問卿當官以何為先對曰真宗皇帝所制文臣七條盡之矣此萬世子孫之法然

臣之當官每以公忠為先既盡公忠則不為朋黨不畏
彊禦以之為臺諫則持正論以之坐廟堂則行正道處
富貴而不以為榮當鼎鑊而不以為愬公忠二字其用
甚大未有一日捨之而安者帝曰卿宜無忘此二字公
因言曰千金之子不垂堂百金之子不倚衡竊聞陛下
以萬乘之尊為鞠戲之樂有如馬驚為之奈何臣竊為
聖躬憂之帝曰朕無它但欲不忘鞍馬爾後五日除端
明殿學士簽書樞密院事越二日兼權叅知政事戶部

侍郎林安宅請兩淮行鐵錢帝以問公公力言其不可
安宅以此大與公不相平十二月拜中大夫叅知政事
兼同知樞密院事公入謝帝謂公曰朕聞卿等每事必
有條理堂吏不能為姦公曰臣安敢必其不為姦惟每
事必經意乃付吏庶權在臣等則不在吏爾時臣下有
刊名上章謂之白劄子帝嘗下之中書公因言曰事若
可行彼胡不顯其名示人以公如不可行則白劄子安
用帝乃問曰朕欲用魏杞何如公曰古人有曰知子莫

如父知臣莫若君興化自建炎間嘗有詔輸米二萬石
佐福州軍食謂之協餉至是四十年民猶病之守臣張
允蹈書極言其為害公言於帝歲捐其半後盡除之乾
道二年春帝臨軒策士及唱第一人乃趙汝愚公進曰
宗子文學如此極可喜宰相洪适曰此實陛下作成之
效自嘉王後未嘗有宗子魁多士者陛下宜魁之以勵
宗室公曰不然本朝典故有官而試者不得為第一人
自沈文通始徽宗宣諭嘉王楷不欲以魁天下以第二

人王昂為舉首昂亦登仕郎有司失於奉詔至今非之
帝曰當從典故叅政言是也有江陰軍判官受賕大理
寺上其獄帝曰貪吏朕欲行漢法誅之适曰誠如聖諭
若行漢法擇一二甚者庶變風俗公曰本朝自祖宗以
來未嘗殺一士大夫史冊書之天下以為美事臣願陛
下以唐虞三代為法漢唐又安足道時武臣梁俊彥請
稅沙田蘆場帝以問公公對曰沙田者乃江濱乍出沒
之地水激於東則沙漲於西水激於西則沙復漲於東

百姓隨沙漲之東西而田焉是未可以為常也而蘆場
則臣未之詳也且辛巳軍興陛下矜兩淮之民連年苦於鋒
鏑田租並復至今未征今統沙田乃不勝其擾帝曰誠如卿
言祖之正者尚除之況沙田乎公逮俊彥至中書切責
之曰汝言利求進萬一淮民怨咨為國生事斬汝不足
以塞俊彥惶恐汗下是日有詔淮東沙田蘆場並罷明
日公入見言蘆田沙田事昨以詔行之今以臣之一言
而詔罷之真所謂聞一善言見一善行沛然若決江河

者聖德高明史官書之可與堯舜禹湯齊驅矣自洪造
罷相公與魏杞同參政事兩無所私每議必同帝一日
問公曰朕欲用林安宅如何公對曰安宅居福唐臣居興
化實鄰郡少時同入太學此人當官吏事強敏惜其褊
心不能容物爾若蒙陛下擢置政府臣得與協力以事陛
下臣之願也帝笑曰卿言甚公甚公益有以公與安宅不相
平上聞者故有是問未踰月安宅果上章論之云葉十五
官人受宣明富人周良臣錢百萬得監鎮江府大軍倉公

上章乞下吏辨明帝曰非追逮不可公曰必兩造具備是日除公資政殿學士提舉臨安府洞霄宮公拜命即日出關帝下公章大理寺寺官引嫌辭焉更下臨安府公至嚴陵制獄移文逮所謂葉十五官人者乃公之長子元泳實不在旁以報逮書公至金沙再移文逮葉十四官人乃公弟之子元潏也元潏毅然請行即日就道親故無不壯之者公至興化念元潏以一身二千里就逮恐仇家包藏禍心元潏非命則讒無由而白公乃上章曰聖明之朝事

必閱實然臣私憂過計竊慮有司觀望或容心於其間臣
仰惟國家聖祖神宗用刑欽恤雖錦工之賤獄吏之微亦
皆引對至於婦人李氏兩至殿庭故中外無幽杜壅閉之
事伏望陛下明聖獄成之日先以上聞賜以睿覽仍乞依
祖宗故事親加審克庶刑不寃時王炎帥臨安帝令炎親
鞠之元潁至有司與周良臣置對初無秋毫跡然安宅時
同知樞密院王伯庠為侍御史恐喝典獄必欲大致人人
危之公章至帝下之臨安獄成上聞親覽帝御筆書其後

曰安宅伯庠風聞失實事關大臣並免所居官安宅仍
貶筠州時乾道二年八月也明日叅知政事魏杞蔣芾
以周良臣具獄進帝曰安宅伯庠之罷非止為葉某一
人設也不如此後來大臣必有謗以曖昧執政請以公
知泉州帝曰無罪而去當召以來又明日詔公詣闕一
時賢大夫莫不咨嗟嘆息謂公自徒步至執政初非勲
舊一罹讒間人情岌岌非天子聖明不能直此冤非公
清介不能脫誹謗非元潯廉孝不能果此行公上章以疾

懇辭名命者再降詔促名者亦再既入見帝問勞加禮
且曰卿之清德自是愈光矣公深引咎退見魏蔣二公
曰上自促名叅政意有在矣叅政未至前數日上嘗曰
朕近日有三事快意中外翕然皆以為善如治臺諫
誣大臣此其一也主上聰明果斷真可謂中興之主叅
語未竟聞有詔除公知樞密院事公未拜有詔鎖學士
院拜公尚書左僕射同中書門下平章事兼樞密使公入
謝未及言帝曰林安宅向者章疏朕問之得之鄭曷安

宅已逐居筠州鄭曷不可不責公對曰臣遣猶子就逮之時因思自昔人臣作誣謗者多矣類皆吞聲忍辱而已安得如臣今日辨明若是者此皆出於陛下獨斷臣之父子死而生之骨而肉之陛下之恩大矣大恩未報務修小怨實非臣事陛下之本心帝曰不念舊惡怨是用希卿有焉公又言臣識慮淺短進思盡忠退思補過之外惟知薦賢以事君父帝曰惟賢知賢公為薦汪應辰王十朋陳良翰周操陳芝茂王佐芮燧林光朝等可

備執政侍從臺諫給舍之選帝納用焉又言曰自古明君用人使賢使愚使姦使盜寸長不遺惟去太甚帝曰固然堯有禹皋亦有共驩周有旦召亦有管蔡在用與不用公曰誠如聖諭臣謂今日在朝者雖未見有如共驩管蔡然有竊弄陛下之威福者臣亦不敢隱帝曰朕正欲聞之時召鄭聞既至見上公啓擬欲除右史帝曰可命未下而外已傳同知樞密院陳公俊卿曰某聞之洪邁邁聞之龍大淵公曰某當以公言為驗乃於帝

前極論大淵與曾覲竊弄威福向也不得其實今以鄭
聞事觀之實矣帝曰此朕之僕臣卿呼至中書切責可
也公曰固陛下僕臣然二人在東宮事陛下久從龍扶
日官已高矣大淵今為承宣使乃侍從也臣安得而呼
責之帝曰朕不憚去此二人後有事大於此者當極言
之始終無隱公拜謝而退明日朝退魏杞獨留帝先問
及二人事杞對如公言是日有詔龍大淵可兩浙東路
副都總管曾覲可福建路副總管二人既出中外相慶

以為太平盛事時公為首相魏公杞為次相蔣公希叅
政陳公俊卿同知樞密院權叅政四人同心輔政中書
之務頓清帝以國用未裕有詔謂理國之要裕財為急
前二三大臣忽之至於用度浸廣漫不加省夫百姓既
足君孰與不足量入以為出可不念哉自今宰相可帶
制國用使叅政可用知國用事公乃言曰今日費財養
兵為甚藝祖皇帝肇造區宇東征西伐兵不過十五萬
建炎以來外有強敵內有盜賊兵數亦不若今日之多

惟多則有冗卒虛籍無事則費財有事則不可用雖曰汰之旋即招之以臣之愚如欲足國用當嚴於汰緩於招可也孔子曰節用而愛人蓋節用而愛人之政自然行於其間若欲生財徒害民爾帝曰此至言也殿前軍帥王琪恃寵每於上前妄薦人才一日帝謂公胡與可可用公曰陛下何以識之帝曰聞之王琪公曰與可奴事諸宦官朝士切齒王琪之職將也應薦武何預與可陛下以此可知其人矣臣不敢奉詔公退而逮與可至

政事堂之賓次令條具本朝故事何人受將臣薦得何
官者與可無以對踧踖遁去大將戚方剝軍結宦官帝
欲窮治以警其餘公言曰方之罪固不容誅然有主方
者帝曰陳瑤李宗回其尤也治之不可不急公言曰久
無此舉雖齊威王烹阿與譽阿者何以異諸將聞之誰
敢不洗心易慮既而御筆戚方之家可沒入其財三之
二以勞軍公又言諸將若此者衆恐人有自疑之心不
若止因有司所白其放散官錢之數籍以勞軍則邦刑

既伸物情亦安明日帝見公曰卿所議戚方事深得體
帝又曰建康劉源亦嘗賂近習朕欲遣王柞廉其姦公
曰臣聞廉者甚於姦者帝乃止明日大理寺上陳瑤具
獄其贓為錢二十萬帝曰此曹為姦宜涅為城旦屏之
遠方公奏曰凡假陛下威福為姦者皆然可盡涅乎願
勅賜自新帝曰甚善於是詔陳瑤除籍答背免涅長
流循州李宗回除籍編置筠州詔免治行賂者乃必罰
毋赦帝嘗謂公曰朕思祖宗法度創之甚難壞之甚易

公曰臣嘗見元祐三年進士第一人李常寧廷試策篇其首四言云天下至大宗社至重百年成之而不足一日壞之而有餘當時以為名言帝曰誠為名言公曰蓋壞者非一日遽能壞也言一念慮間不以祖宗基業為意每事不省馴致敗壞如陛下憂勤恭儉慮精政事無一念慮之失古聖用心不過如此帝曰朕非獨自警戒而已又慮子孫不能守公曰陛下之言至此天下之幸宗社之福公言治亂在風俗美惡今風俗猶未美帝曰

如貨賂一事非不丁寧尚如此蓋風俗既成以為當然
公曰陛下治陳瑤輩俗不患不改帝曰作成人亦須
歲久祖宗時作成人至仁宗時文武名臣乃出公曰陛
下留意人才如此亦何患不成自古何嘗借才於異代
亂世嘗患無才至創業之君一起所用者皆亂世之人
才也且如藝祖所用將相亦皆五代之人關機合開全
在上爾帝曰甚善公每除吏帝必曲加咨訪公嘗啟除
王樞左司郎官胡元質右司帝曰胡元質佳王樞曉事

否公曰拒極有才吳禮詣中書求為無錫縣帝問澧有
幹才公退朝與諸公言上求治核才如此無不懷懼公
於進賢退不肖惟知任怨不示私恩每退約見所親語
不及朝廷事有關獻納必削其藁雖當國之日淺而公
道開達請謁不行王拒謂公平章萬務無一事私喜怒
者一日有官吏數輩會於逆旅因言某人某事或可以
經營某人某除或可賂得者一人笑曰非不料理惟葉
公不可欺耳歲在丁亥日南至帝親郊而雷公以首相

引漢故事上印綬帝三留之不可以左正奉大夫提舉
江州太平興國宮公歸至富沙聞季弟之訃哀痛不已
遂溪行戒操舟者速行期以某日抵廣化寺蓋公所寓
也既至親戚咸在明日欲歸先廬是夕觴客酒三行公
秉燭作書札丙夜乃寢忽覺云我頭足俱冷取某藥未
至而薨享年六十有八以觀文殿學士致仕訃聞帝追
悼久之贈特進公之師友林師說高登蚤相慕用高嘗
上書譏切秦檜檜名捕甚急公與同邸擿令逸去高曰

不為公累乎公曰以此獲罪幸甚公即為具一舟舟移
公乃去公為人簡易然望之肅然有不可犯即之溫如
也每以接引後進成人以才為己任處州麗水知縣薛
良朋為常州掾曹陳舉善主簿單夔公最許可後良朋
為吏部侍郎舉善為殿中侍御史夔為戶部侍郎故舊
有以公為善風鑑公云吾豈為此觀其言行知之耳公
舊在富沙時同年進士林宗弼同官厚善約迭為姻林
死家貧子幼公仕浸顯先以女嫁其子又命之以官後

以其子娶其女云夫人陳氏累贈齊國夫人子二人元
泳終官朝奉郎通判福州元浚終官宣教郎僉判惠州
女四人適儒林郎新汀州軍事判官林夔朝奉郎江南
西路提點刑獄公事姚宗之朝散大夫京南西路轉運
判官方崧卿文林郎新建寧軍節度推官林澧孫三人
堂承奉郎屋承務郎圭將仕郎孫女三人長適將仕郎
姚案次適迪功郎廣州番禺縣尉方信孺次幼陳夫人
先公九年卒葬於縣之仁德里偉隔山公以庚寅正月

九日葬於善化里烏石大旗山之原公自初仕至宰相服食僮妾不改其舊先廬隘甚不益一椽先疇極薄不增一畝工部侍郎林公光朝以詩哭之曰傳家惟儉德無地著樓臺人以為實錄公之官至少保以長子元泳累贈也公葬後二十有八年元潏叙公之言行以書抵萬里曰元潏先伯父應謚不可不請非行狀何以請願先生哀而書之萬里嘗一識公於丞相府又與元潏同官於曲江每敬公之清德且奇元潏之壯節則紀於右

方如此俾據以請於朝慶元三年閏六月某日具位楊
萬里狀

奉議郎臨川知縣劉君行狀

本貫吉州安福縣

曾祖貫故不仕

祖京故不仕

父過贈承事郎

君諱德禮字敬叔一字子深胄出晉安城太守遐八世

祖德言仕南唐歸本朝為水部員外郎知制誥君幼警敏父遇為鄉先生授徒數百人程其業君必為之冠父累舉不第試春官沒於中都君徒步護喪歸葬母老家貧復以授徒為生再舉於禮部一為首選淳熙二年第進士調常德府司戶叅軍事迎縷解外臺及府中煩使必付有媚其能者欲窮之諷府曰胥與民為市賦租簿書罅漏千萬將欲簡稽非劉掾不可府以付君文書山則大抵今年為戶者乙明年析而甲之今年為戶者

甲明年貶而乙之五年之後不可勝究君不三日悉與
復初即白之府曰州家此意將欲逋租有歸良民亡害
乎抑欲以法從事以威取贏乎謂宜期以十旬許民自
列可不可也太守趙公彥操喜曰仁人之言也即行之
時臨川吳仲權丞龍陽與君文辭炳蔚相輝名動荆楚
稱為二妙部刺史江公溥吳公煥吳公飛英江公作勵
皆一見而器之秩滿用薦者陞從事郎授賀州教授丁
母太安人憂終喪造朝有詔求言君慨然陳時政十事

其一謂古人之有志事功者其君臣上下議論詳密而制度紀綱攻之而無間夫是以所為而成也藝祖嘗嘆息於乾德紀年之失易以開寶當是時草創尚未足多罪鄉者敵之熙宗蓋思陵我高宗居正體元中華之正統而襲用敵國陵名也可乎事下中書時宰怒不復改議授涪州教授夔帥單公夔趙公鞏劉公光祖漕使張公徹馬公震武始至皆具書禮招至夔茹以先務至則必入幕為上客如損益鹽法及外銓擬官法皆君建明

至今用之單馮二公嘗露章薦於朝今丞相京公制置
四川倡憲漕同薦時京公猶未識君也改宣教郎得邑
撫之臨川轉奉議郎邑名為江右之劇視事之初鉅簡
一日五百紙時摘一二譴辭者徐詰以理訟者噤不得
對一邑傳以為神不旬時獄訟頓清暇則與學者討古
賦詩沛然如閒居歲饑富民蘊積饑民趨謹盜發其廩
尉幸賞一日獲十八人且具獄君一問得其情謂尉曰
非盜也尉嗾富者訟之郡郡方移鞠而他所獲真盜乃

釋之常平使者初議賑貸君嘆曰富民聞此必過糴是賑之者饑之也屏吏議一以誠意勸分得粟數萬石民受實惠臨川近郊無曠土官有叢冢之圃曰漏澤者甚隘凡小民之死者無所於葬常平使者居之以屋歲中則以浮屠法火之君為買地數十畝且給以田命浮屠掌之鄉正繇役分爭吏得以賣君曰有賦斯有繇不在此必在彼民之爭吏之喜也每一鄉有踐更者則書其次十人下之俾族議其當為者來上其爭遂息姦民有

曰千虎者持官吏短長聚空舍釀金錢為訟費君盡取
置於法毀其廬豪猾遠屏君持身有嚴奉法唯謹受俸
必問令甲非令甲而曰例者辭之家人子數百指蔬食
終日皆無愠見苞苴不入其門親舊之具必報江西帥
張公杓漕使趙公不遷太守曾公楷或以文或以政或
以廉力薦之予亦薦以文辭典麗宜備著述之科單公
夔來帥江西復帥諸司上其治最下中書書其姓名丞
相京公俟其秩滿將擢而用之更未盡六十日而君屬

疾以沒聞者嘆息實慶元五年五月也得年五十有五
君于學博極而長於周官於文清新而精於四六有文
集二十卷娶王氏闕陽丞化基之女再娶彭氏廣東運判
漢老之女男二人子漸子泰皆進士女二人長適崇仁
主簿孫鑰而卒次未嫁其孤肅丞咸炳偁句諏堀日暨
窶地歲得上章涓灘月得娠誓日得合璧邑曰廬陵鄉
曰高澤原曰太湖云將辟君之弟德性述君之言行謁
予狀之予與君遊久且厚則哭而論次焉年月日具位

楊某謹狀

朝奉大夫知永州張公行狀

本貫亳州譙縣

曾祖言勅賜亳州助教

祖宰贈右散大夫

父允蹈贈朝請大夫直秘閣致仕累贈通

奉大夫

公諱爽字叔保建炎南渡直閣挈其族自亳徙家廬陵

公自幼警敏已如成人既長以文學名下筆有警人語
樞密王公庶器之歸以孫女時直閣猝猝僑居生理草
創有田薄少而季父永春主簿某繼至直閣念其貧公
乃請盡以田遜之而以其私室王氏之橐中裝傾倒以
奉父母兄弟乃立屋廬乃實倉箱以廩族親以燕朋友
中表咸喜紹興庚午薦名禮部乾道六年以門子補將
仕郎中吏部銓授迪功郎賀州臨賀縣主簿丁父憂淳
熙元年循從事郎監隆興府豐城縣戶部贍軍酒庫耐

金增美諸部使者才之命攝丞分寧又移隆興府決曹
掾皆以最聞豫章自建炎兵餘民多死徙賦租罅漏貧
富倒植公私俱病公白府請檢校冒料之田而實其主
名有田此有人有人此有賦府以武寧新建之二邑命
檢校之暮月得實以報府下其法於諸邑郡賦始均邦
民始有生意十邑繪公像而祠之武寧縣令文綱為豪
民條三十事訟之於朝事下江西常平使者鄭公僑鄭
檄公廉問公為直之綱致餽謝公怒却之遂與之絕諸

部使者交章論薦授衡州耒陽縣循儒林諸部使者招
公為衡州決曹掾時刑獄使者嚴急典獄者惟其風旨
公奉法持平無所左右每獄成必齋戒乃上具獄有不
可爭之必力詞勁而氣平有人士董其姓者於他獄已
承殺人之罪錄囚之官問之不承又以付公一問知其
無辜時郡中將進士公請立賞捕正犯者而聽其就試
憲使怒公請不已從之既揭榜而董為待補太學弟子
員既而實殺人者亦就禽有卜者寓病目青同行者以

藥點其瞳子乃漆也遂盲因竊其妻以遁盲者疑其僕
之亂其妻而殺之也執而訴之官其僕不勝拷掠遂誣
服詰其屍則曰殺之水矣邑上之州州以付公公再三
審詰囚無異詞公獨疑曰殺人而奪之妻者古有之矣
殺妻而存其人未之有也公以白郡守守曰寧有是哉
就令有之邑令不坐失入無之公不坐失出乎公曰二
事細故耳憲使雖嚴可以理解以非罪殺人某所不敢
也明日白之憲使果曰公致獄好為異公固爭曰其人

未論決猶可以俟其真盜也已論決而真盜出則如之
何未幾其妻與為亂者自相訴於武昌移文至舉郡驚
異秩滿用舉主十三員改宣教郎知袁州萍鄉縣轉闕直

郎吏民交通持官短長舊令煩苛公用寬大闢庠序廣
生員期年舊俗盡革一夕霖雨江水驟漲夜半居民水
將及簷公獨秉燭集吏呼船具餉且食且載令曰活一
人者賞若干遲明勞問無一人溺死者父老至今德之
富民有柳時習者以族人某無後而立子欲以其子後

之而有其貸訟二十年不決郡以屬公公立談而決皆
以為神萍鄉湖廣道所出土夫落南有死生不能歸者
公送迎賙助皆得平達前後數十百云轉奉議郎覃恩
轉承議郎錫服朱銀除通判隆興軍府事紹興五年至
隆興以考績及覃恩三轉至朝請郎時趙公鞏蔡公戡
相繼帥豫章事無大小一以屬公帥每閱文書公未書
名則吏不得以進秩滿諸部使者皆以最聞除知永州
轉朝奉大夫湘南名郡舊稱甲永乙邵公至則帑庾赤

立是歲復蝗捐瘠載路公節浮費糴鄰郡控於諸郡者
得粟十萬石博諭勸分活饑民九萬有奇封公帑塵厨
傳觴酒豆肉一錢粒米必靳也有以客主禮望公者讙
語謂永之荒政有實費無實惠常平使者李公楫聞而
疑焉陰遣人微伺之又行部往省之饑民所廩其籍無
浮常平所儲其粟無縮媿且嘆曰吾為不知賢矣乃同
今漕使陳公研俱薦公於朝少傅丞相益國周公以書
賀之曰過客責備動輒興讒若非陳公親往觀風豈能

知行治第一氓謠藹著也嗣歲大稔公封公帑如初永
之富復甲湘南云更未盡一月嬰微疾州民徧走羣望
以祈既篤命諸子曰我死棺斂與道里費皆勿煩官俸
之未給者皆勿請千萬致意周楊二公乞銘與行狀我
無憾言訖而終實六年九月五日也享年七十四州民
哭之如哭所親公為吏寬嚴得中材力敏濟惟劇惟難
彌出彌裕其仕差晚明習練達輶之之充發之之審而
施之不窮為國愛材者惜之歸路由萍鄉空邑越數十

里而迎哭皆失聲明日又哭送公為文簡嚴精粹而不
顧人知中書舍人林公光朝與著作郎劉公夙嘗相與
嘆曰張叔保佳士也恨不盡見其文牋記中亦可見其
一斑矣夫人王氏封宜人先公九年卒男五人履賁隨
臨觀履迪功郎新辰州淑浦縣主簿賁當以公之遺澤
蔭補孫男七人長孫仲孫晉孫季孫衛孫同孫永孫女
六人履與其弟護公喪返柩於家將以是年十二月丙
午葬公於高澤鄉永和鎮新莊宜人墓之左方萬里與

公同生丁未而公為長又同鄉舉於紹興庚午且相好
公又以行狀命萬里其忍不奉教慶元六年十二月十
二日具位楊某謹狀

中散大夫廣西轉運判官贈直秘閣彭公行
狀

本貫吉州廬陵縣

曾祖士忠故贈朝請郎

祖衍故左朝奉郎累贈正議大夫

父合故右朝請大夫尚書戶部郎中總領
湖廣江西京西路財賦累贈特進

公諱漢老字季皓其先金陵人五世祖避地廬陵因家
焉公幼長於詩紹興季年以門蔭補官桂帥李公如岡
器之辟宜州思立縣主簿以廉介受知漕使余公良弼
鄧公酢薦於朝三歲丁父憂隆興甲申服除循修職郎
監潭州南嶽廟調沅州司理叅軍一因以剽掠繫獄指
病如股公白之守卒從寬比部使者以寬厚勤敏廉正

薦者凡十有三循從政郎改宣教郎知常德府武陵縣
轉通直郎邑有官池數十頃大將邵宏淵乾沒其利而
不輸租有馬從事冒占民田百畝公皆復之轉奉議郎
有二畝訟田公諭以比鄰友助二人感悟遜畔有武臣
祝其姓者掠仕族女為婢公分俸嫁之帥臣尹公機憲
使辛公棄疾以其事上聞詔下中書書於籍授江西提
刑司幹辦公事轉承議郎又轉朝奉郎賴水暴漲浮梁
蕩逸西昌畝有歲舟者事覺憲使攝州事怒甚畝致白

金以請公却之而慝為開釋屬郡有武臣翟其姓者秩滿以事苛留公為解之翟德之餉新茗二小缶公發之黃金也公笑而歸之賴守丞相留公率二憲薦於朝錫服朱銀授湖廣總領所幹辦公事武昌屯兵數萬仰給六路之餉而漕運多後期且折閱士夫坐縲繫者衆公言之於總餉使者曰折閱之弊非一或州郡朘其道里之費或乙買之甲者之手或胥吏賕謝或舟人侵牟兼是四者官賦焉得而不負四弊革則無折閱矣於是繫

者釋轉朝散郎總使蔡公戡趙公彥逾以罷能薦而公
欲自適力請為祠官授主管成都府玉局觀東歸道由
劍城故舊有死而未葬者公分橐中裝佐其襄事轉朝
請郎又以太上龍飛恩轉朝奉大夫授知均州主管管
內安撫司公事訓詞曰財術疏通分命汝宜賜對選德
公從容論奏三事曰補諸軍尺籍之缺員核諸郡寄積
之外府嚴楮券增損之禁令上一再稱善未幾有詔覈
軍實審寄楮重楮券轉朝散大夫將至郡漕使方公鍾

語連率今少保吳公琚曰武當得人矣先是守臣數易
帑庾屢空公曰天下豈有不可為之郡於是興學校請
博士而士知學釋逋負寬賦役而民蒙福捐俸以棺斂
而藁葬之俗易闢園以居丘墓而棄死之憾除桐栢山
有寇鄰者號寇先生居南垂北際之間有衆數萬為夏
商憂公移文諭以禍福撫以恩意三歲不敢動暇則登
覽山川密察形勢乃請增戍兵以控要害修器械以壯
武衛豐歲計之儲足常平之本疏奏有詔下戍卒戎器

二事於所部一日覘者言有降寇二人公飭邊吏令毋涉吾地武當麥賤官吏販鬻斛易白金兩公下令曰犯者必劾貪風頓革故事吏俸以茶楮代緡錢之半復損其半緡錢之陌守獨不然公以身先之僚屬歌舞士夫仕蜀東歸舟過吾境疾者藥死者葬孤者廩轉朝請大夫襄帥尚書張公杓漕使諸公晞顏交章薦進且以書白宰相曰彭某治郡先慈惠固圉務在鎮靜今上登極轉奉直大夫明年詣闕有詔賜對公奏二事其一請增

均州之戍兵而精其器械其二請赦邊郡之逃卒而許其還籍上首肯授知常德府遭辰沅靖州兵馬盜賊公事封廬陵縣開國男食邑三百戶訓詞有曰爾公清可以臨民惠和足以綏遠轉朝議大夫外臺鄰郡有餽觴豆之貲者緡錢月計二十萬公別貯之一日詣學宮顧眡牆屋傾圯乃僱工斂材取具於此有燬畢者裔出文簡老矣而二女未嫁又以其餘為之歸裝後皆有歸士君子頌嘆焉暇日披職方圖記見武陵兵籍昔三千人今

僅十一請增至五百人上俞其請於是室廬戈甲煥然一新軍勢整肅冠於旁郡有詔減磨勘二年有挾貴覓舉者公不荅時苦水潦穀價倍蓰細民艱食而常平使者住攝荆帥公曰事亟矣遽發倉廩數千不暇白使者聞之曰謂後世無汙直可乎總領趙公不迹倉使梁公季玘漕使鄭公桌上其治行轉中散大夫除廣東轉運判官公入境諸臺餽贍秋毫必辭改除廣西轉運判官公曰足未履臺治而復易節上恩厚其何以報乃擷取屬

部士大夫之賢且才者如曲江守曾慤主管文字王久
大淮泉局鄭應中薦於朝曰是亦報國之一也既解組
舟行至端溪意忽若小劇者急呼其子某曰為我上章
納祿因小憩夢覺而逝實慶元庚申二月九日也後兩
月除直秘閣致仕訓詞曰制行無虧居官可紀以疾而
休朕固深惜毋黃武陵郡夫人天性孝友二女弟娶居
公撫育獨厚仕必偕行且必令歸士大夫後其一適從
政郎隆興府豐城縣丞李克其一適文林郎贛州觀察

推官朱先祖其憂乃解族親有婚姻過期未畢鄉鄰有
祖父之喪久不能舉者公乃出力經紀之娶曾氏係出
南豐前福建漕使孜之從孫先公十年卒封贈至令人
子男四人堯俞先令人十有七年卒去疾文林郎前監
廣州市舶庫嘗與計偕去泰廸功郎前靜江府司戶參
軍去非以公致仕恩當補通仕郎女三人長適通直郎
新知隆興府武寧縣歐陽侯次適故奉議郎知撫州臨
川縣劉德禮季未嫁而卒孫男六人舜牧舜元舜愷舜

申舜欽舜庸女八人長適故儒林郎新鄂州州學教授
趙師共餘未嫁諸孤護公柩以歸將以某年某月某日
葬於某所去疾來謁予請狀公之行以乞銘於丞相益
國周公則敬諾而書之如此時維嘉泰元年某月某日
具位楊某謹狀

朝請大夫將作少監趙公行狀

曾祖承錫潁川郡王

祖克家崇信軍節度使安康郡王

考叔贊通議大夫

公諱像之字民則秦悼王之六世孫也今居高安穉齒嗜學至忘寢饋痛掃綺襦鎖礪螢雪年未冠洞曉經訓貫綜太史公班固書屬文立成風蹕川達小試郡博士館下每蹙寒士于下風而立其上與其仲氏儼同登紹興十八年之乙科年二十有一為宗子第三人授修職郎撫州司戶叅軍有異縣令尹苛暴以苛政免者部使者下二尺木書詭它官攝之皆移疾不行諸公合議差

擇命公公不辭於是用仁滌苛以廉鯁汙郅政惠化滂被四達民譽出諸公薦之陞從事郎郴州軍事判官溪徭出掠漢民靡寧部使者檄郡丞往尉安之懼不敢往公請代行丞感泣公單車深入蠻巢召其酋長諭以朝廷德意即日聽命三十一年逆亮寇邊王師征之朝廷下虎符發諸郡材官柳兵不滿三百不發則違詔發之則郡無備公為太守草奏請勿發免符下州民守譙門呼舞為賀且謝守曰此趙判官草奏力也它日有詔賚中

外諸軍餐錢而無其數郡欲請而候報士譁於庭守慙
不出公往叱之曰而輩人不過得數十百錢爾今欲何
為遂白守用郊賚故事畀之衆定公陰求其倡者白守
先誅之而後自列於朝有詔下郡國繕甲櫛小州也而
其數視潭府官吏莫知所措公曰此易辦爾先是境內
有官軍禽盜既去而棄其甲者居民或歲棄之公令求
之以應焉再轉潭之攸縣令宜章縣兵李金倡蠻數千
人起為盜張甚聲震湖廣孝宗皇帝特命中書舍人劉

公珙帥長沙委以平賊劉公入境公與縣令御之境上
劉公以公知名士也送客獨留諏以平賊之策且問郴
城堅瑕之狀公曰小而堅然難守曰何也公曰城中有三
井爾受圍五日不待戰死已渴死矣曰為之奈何公曰
此賊非湖南材官所能了也非鄂渚羽林不可劉公遂
用公言以聞朝廷遣一將谷青者來賊即伏誅劉公首
薦以改秩且請擢以不次之位後帥張公孝祥至得公
賤記手之不釋以示幕下士曰吾當薦士無出趙令右

者矣。即刺薦書且招公入府。為十日飲。時侍講張公栻
與侍講朱公熹相與講習。皆與公遊。文名詩聲焯乎朝
野。改左宣教郎。知鄂之蒲圻縣。會諸道大侵。流殍相望。
蒲圻邈在湖山之外。地荒民貧。公勞來安集。振貸有方。
境內安業。旱不為灾。部使者及太守交章上其最。詔與
中外陞擢之職。除知漢陽軍。見上辭行時。孝宗方銳意
恢復。公進言曰。鷙鳥之擊。必匿其形。舉大計而使敵人
有備。我之心非策也。願陛下晦其強。以驕其心。使不我

備修政刑廣儲積礪兵甲選將帥觀釁而動待機而發
使如雷霆不及掩耳又言召見多士許其進言此盛德
事也然人懷希合之心好立新奇之論聞之若可喜行
之則無實願審於聽言而謹於出令上皆稱善鄂之一
軍其舟師蒙衝視諸營屯獨雄且精每歲夏潦孔殷則
艤於鄂之西浦霜降水落則艤於漢陽之劉洲明年復
如初歲中在鄂者四閱月在漢陽者八閱月而守舟者
不滿百人公之未至一夕火延其涯焚其四艘公至訪

其利病有在並言於朝請移一軍隨舟次舍事下軍帥
帥未嘗以火事聞怒公發之竟格不之行沔之於鄂相
望於大江之南北故事沔守未嘗踰境至鄂比十年間
始有諂事諸部使者而越江者其始曰慶朔望其後曰
受約束遂旦旦而往公至之初典謁以近比白公曰先
是有不往者否曰無之公為書與諸公曰守臣出境非
令甲也因不復往諸公聞有以公為傲者來索錢穀簿
書實搜出入以求公罪見民無橫斂官無罅漏吏俸兵

食給無虛月而公之俸不自與者餘一歲於是敬歎諸公復表其治狀公因上章極言守臣渡江之弊孝宗大喜曰所未聞也有詔繼今敢有謁與受者抵罪惟均改守全州丁通議公憂服除貧甚有房州別駕虛位公欣然詣曹受署房陵與公所居相距三千里公留孥以侍母太碩人宋而匹馬之官守缺兼行府事勤恤遠民專務惠養境內告旱公精意雩禱不崇朝而雨民皆欣然曰此趙公雨也丁太碩人憂服除將造朝一日孝宗御

華拱殿見文武俊乂盈庭天顏有喜因問班綴中屬籍
在列者若干人則曰無之於是愀然不怡即詔侍從舉
宗室文學政事可謂中外之用者各二人吏部尚書蕭
公燧首以公應詔除知郢州公見孝宗論事剴切上喜
曰觀卿議論非苟合者郢非所以處卿卿當留侍朕即
日除軍器少監朝士相慶以為得賢同年進士官於朝
省者七人一日有陳郎中之喪七人致奠其一人叅政
蕭公以祭文屬公為之其文一日傳都下云在列未滿

歲白丞相勾補外丞相以聞上留之不可乃除湖南常
平使者辭行上首問曰何求去之力又曰湖南去朝廷
遠甚一路部使者之寄非輕卿宜廣儲以備旱戢嵯茗
之私鬻公對曰儲積一事臣敢不欽承天子休命地非
近鹽惟產茗然戢之亦當以漸上喜曰卿言是也急則
激之使亂矣朝士惜去置酒飲餞踰月公不得行入皆
賦詩以詠歌其退勇守堅之節所部利病公至之日亟
罷行之歲適小儉公與連帥潘公時講求荒政發廩移


粟民不流徙移江東常平使者未上改西外知宗宗司
有學有教授官有夫子廟而無祀事宗盟子弟無所觀
禮春秋上丁附拜於郡庠公進諸生講學政之未周密
者首諗之曰學奉先聖而不祀可乎或曰禮器未具公
計費召匠製冕并繪藻火斲豆治尊爵列磬管潔秬
鬯卜牲牲明年服器既成先期躬率諸生致齋直廬夜
漏未盡十刻公夙興盛服將事陟降拜起沃盥奠瘞禮
文於架盛於一時云未幾即拜福建路提點刑獄公事

建臺之始風采一新浦城縣獄有以平民為大辟者其人誣伏其獄未上公平反之劾其令免所居官一路讐服又劾帥屬王次春於邊密中呼營妓歌舞飲酒其人甚口人皆為公危之公不顧也竟墮其語寔而去未幾請為祠官丞相京公鏐遺公書曰官有似祠官而祿差豐者帥司叅議官是也公肯俯而就乎乃俾食江西添叅議之祿以便其里居之適焉少無宦情年未五十即治別墅號曰南疇花木成列松竹造天皆手植也一觴一

詠左琴右書翬然有違世之想不治生業老而益貧有
問者公曰居閒食不足從事力難任吾故未能以此而
易彼也嘉泰二年四月二十三日以疾終於正寢官至
朝請大夫賜紫金魚袋享年七十有五配任氏太平州
通判望之女也封宜人先一月卒年七十子四人公掄
迪功郎贛州左司理叅軍公括迪功郎吉州司戶叅軍
公哲將仕郎幼未名女四人長適從政郎向士充先公
而亡次適儒林郎王楫次適進士某次未嫁孫男二人

長彥法次未名孫女二人並幼公性淵靜不見澄撓遇
物傾豁洞見表裏然剛而不褻介而不虐雖貴介公子
而瞿然退然若寒畯故其為詩平淡簡遠如清泉白石
蒼松翠竹初無鈎章棘句之苦心而有絕塵拔俗之
逸韻其文尤長於論事上前敷奏坦明練達灼然可行
孝宗恨見之晚方登進而浩然去之使上有用不盡之
嘆天下之賢士大夫惜之云諸孤得卜以是歲十一月
八日葬公於高安縣來賢鄉雲居山中主岡之原以宜

人附馬將辟公括移書且錄公之言行來請行狀公某
之鄉舉明有司也狀之為宜門人通議大夫寶文閣待
制致仕吉水縣開國伯食邑七百戶楊萬里謹狀



誠齋集卷一百十九